

## PRVA DETELINA

*Pripek jaki i sparina.  
Se od žege zrak trepeče.  
Nigdi vetra — sot tišina.  
Žarko sonce strašno peče.*

Fran KONCELAK

# Tri pjesme

### FRANU GALOVICU

*Živel jesi, pesme pisal.  
Srca radost, bol i togo  
Vu njih dal — kak da si znal,  
Da Te ne bo — ne bo dogo.*

*Hudo vreme — rat krvavi,  
Moral si i Ti pojti v boj.  
Brat Te zgodi — smrt zadavi  
Za gospocko volo — Frane moj.*

*Jesen blaga — grozdje zrelo  
Diši slatko v goricaj.  
Žoto, rozno — crno, belo  
Bere se i nosi vu putaj.*

*Noč je stigla — zvezde zlate.  
Mesec Ti pri kleti baš je stal.  
Zmislit se je morti na Te,  
Pak se dale na pot dal.*

### SI MI SAKAK DURAMO TE DANE

*Si mi sakak duramo te dane.  
Gda gda lepe, optom gošće grde.  
I žene so milne, dok so još mlade  
Al stare so osorne i trde.*

*Čovek se nad čoveka prći, nadmeče.  
Jen drugom je jalen i dela se špota.  
A vreme to naše kak bujica teče.  
Gadi mi se gadi, ta naša sramota.*

*Život nam takov čemeren baš je.  
Od vajkada več slabog gnjete jaki.  
Kak zdrapan bogec, tak i gizdav bogati  
Mir našel bo saki vu svojoj raki.*



*(Josip Fluksi: Guslar)*